

**Kalaallit Nunaanni eqqartuussissuserisutut inuussutissarsiuteqarnermi
malittarisassat immikkut pingaarutillit pillugit eqqartuussissuserisut
ingerlatseqatigiiffianni piginnittut eqqartuussissuserisuunngitsut
misilitsinneqartarnerat peqataaffigissallugu pisussaaffeqarnermik nalunaarut
(piginneqataasut misilitsinneqartarnerat)**

Kalaallit Nunaanni eqqartuussisarnermik inatsimmi nr. 305, 30. april 2008-meersumi § 76, imm. 5 aamma 8 naapertorlugit aalajangersarneqarpoq:

§ 1. Eqqartuussissuserisut ingerlatseqatigiiffianni sulisut eqqartuussisarnermik inatsimmi § 76, imm. 3, nr. 2 naapertorlugu eqqartuussissuserisuunngitsut eqqartuussissuserisut ingerlateqatigiiffianni aktiaateqarnikkut imaluunniit piginneqataassuteqarnikkut (piginneqataanikkut) eqqartuussissuserisutut inuussutissarsiuteqarnermi malittarisassat immikkut pingaarutillit pillugit misilitsinneq (piginneqataasut misilitsinnerat) angusiffigissavaat, tak. eqqartuussisarnermik inatsimmi § 76, imm. 5.

§ 2. Piginneqataasut misilitsinnerata imaa pilersaarusioneralu pillugit malittarisassanik inatsisinik atortitsinnermut ministereqarfiup pikkorissartitsinnerut ataatsimiititaliaa aalajangersaassaaq. Piginneqataasut misilitsinneranni naliliisussanik Eqqartuussissuserisut Siunnersuisoqatigiiffiat inassuteqassaaq naliliisartullu pikkorissartitsinnerut ataatsimiititaliamit atorfinitsinneqarlutillu soraarsinneqartassapput.

Imm. 2. Piginneqataasut misilitsinnerat minnerpaamik ukiumut ataasiartunik pisartoq Advokatsamfundip ingerlatissavaa.

Imm. 3. Piginneqataasut misilitsinnerannut peqataanermut Advokatsamfundi akileeqqusissaaq. Akiliummut misilitsinnermi aningaasartuutit aamma misilitsinnermi atortunut, akissarsianut allaffissornermullu aningaasartuutit ilanngunneqarput. Tassani sinneqartoorutaasinnaasut amigartoorutaasinnaasulluunniit Advokatsamfundip akisussaaffigissavai.

§ 3. Piginneqataasoq eqqartuussissuserisut ingerlatseqatigiiffianni aktianik piginneqataassutinilluunniit pigisaqalernermini misilitsinnissamut tulliuuttumut siullermut peqataaniarluni nalunaassaaq. Misilitsinnermi peqataanissaq ullormi aktianik piginneqataassutinilluunniit pigisaqalerfimmi nalunaarutigissallugu pisussaaffiuvoq.

Imm. 2. Aktianik piginneqataassutinilluunniit pigisaqalernissamik nutaanilluunniit pisinissamik pituttuisumik isumaqatigiissuteqarnermit imm. 1-imi aalajangersagaq apeqqutaatinnagu piginneqataasut misilitsinnerannut peqataaniarluni nalunaartoqarsinnaavoq misilitsittoqarsinnaallunilu. Aktianik piginneqataassutinilluunniit pigisaqalernissamik nutaamilluunniit pisinermi pituttuisumik isumaqatigiissut atsiorsinnaatitaanerillu piumasaqaatitaqaraluarpataluunniit imaluunniit obligationit akiitsulluunniit allat allagartaat qularnaveeqqusiullugit ingerlatseqatigiiffimmi aktiaatinit piginneqataassutilluunniit pisassat allamut nuuneqarsinnaalersinnerisigut taarsigassarsisoqaraluarpalluunniit aalajangersagaq taanna aamma atuuppoq.

§ 4. Piginneqataasoq marloriarluni soraarummeersinnaavoq. Piginneqataasut misilitsinneranni peqataangitsoorneq soraarummeernermi angusinngitsoornertut isigineqassaaq. Tamaattorli tamanna atuutissanngilaq unioqqutitsinngitsumik peqataangitsoortoqarpat assersuutigalugu napparsimaneq pillugu nakorsamit uppnarsaat pikkorissartitsinernut ataatsimiititaliamut takutinneqarpat.

Imm. 2. Piginneqataasoq piginneqataasut misilitsinneranni soraarummeeqqaarnermi angusinngippat imaluunniit pissutissaqavissumik peqataangippat, tak. imm. 1, piginneqataasoq soraarummeeqqinnissamut tulliuuttumut peqataaniarluni nalunaassaaq. Nalinginnaasumik misilitsinnerup kingorna kingusinnerpaamik qaammatit marluk qaangiunneranni pisariaqartitsineq malillugu Advokatsamfundi soraarummeersitteqqissaaq.

Imm. 3. Imm. 2 malillugu napparsimasimasunik soraarummeersitseqqinnermi angusinngitsoq soraarummeersitsinissamut tullermut peqataaniarluni nalunaassaaq.

§ 5. Piginneqataasoq § 3, imm. 1 imaluunniit § 4, imm. 2 aamma 3 naapertorlugit piginneqataasut misilitsinnerannut peqataaniarluni nalunaangippat imaluunniit piginneqataasoq marloriarluni misiliinikkut angusinngitsoq eqqartuussissuserisut ingerlatseqatigiiffianni piginneqataalersinnaatitaanngilaq.

Imm. 2. Piginneqataasup eqqartuussissuserisut ingerlatseqatigiiffiannik imm. 1 malillugu piginneqataasinnaatitaanngitsup ingerlatseqatigiiffimmi aktiaatini piginneqataassutiliniluunniit ingerlaannartumik tunissavai.

Imm. 3. Piginneqataasoq eqqartuussissuserisut ingerlatseqatigiiffianni imm. 1 malillugu piginneqataasinnaatitaanngippat tamanna eqqartuussissuserisut ingerlatseqatigiiffianni piginneqataasunut allanut ingerlaannartumik Advokatsamfundip nalunaarutigissavaa ingerlatseqatigiiffimmilu aktiaatai piginneqataassutaaluunniit pinngitsaaliissummik ingerlaannartumik tuniniassallugit.

§ 6. Eqqartuussissuserisut ingerlatseqatigiiffianni aktianik piginneqataassutinilluunniit § 3, imm. 1 naapertorlugu pisinermiit ukiut marluk qaamatillu arfinillit kingorna piginneqataasut misilitsinneranni angusinnitsoq pisuni tamani aktianik piginneqataassutinilluunniit § 5, imm. 2 malillugu tunisinissaminut pisussaataavoq. § 5, imm. 3 taamaaqataanik atuuppoq.

§ 7. Piginneqataasut misilitsinnerat naliliinerlu pikkorissartitsinernut ataatsimiititaliamut piginneqataasumit naammagittaalliuutigineqarsinnaapput. Piginneqataasut misilitsinnerata inernera pineqartumut nalunaarutigineqarneranit kingusinnerpaamik sapaatip akunneri marluk qaangiunneranni naammagittaalliuutigineqassaaq. Naammagittaalliuut digitalikkut nassiunneqartoq digitaliuqkut atsiornertalerneqassaaq.

Imm. 2. Naammagittaalliuut misilitsinerni naliliisartumut allattoqarfiup piaartumik nassutissavaa. Misilitsinerni naliliisartup misissueqqinnermigut “angusinnigilaq”-mik naliliissut “angusivoq”-mik allanngortinneqassasoq aalajangersinnaavaa imaluunniit naliliissutaqqaartoq attatiinnarneqassasoq imaluunniit misilitsinneq atorunnaarsinneqassasoq pikkorissartitsinernut ataatsimiititaliamut inassutigisinnaallugu, taamaalilluni misileeqqinnerit marluk § 4, imm. 1-imi taaneqartut naatsorsuutaajunnaassapput.

Imm. 3. Naliliissutip attatiinnarneqarnissaa, misilitsinnerup atorunnaarsinneqarnissaa imaluunniit naliliissutip “angusinnigilaq”-mit naliliissummumut “angusivoq”-mut allanngortinneqassasoq pikkorissartitsinernut ataatsimiititaliap aalajangersinnaavaa. Misilitsinneq atorunnaarsinneqarpat piginneqataasut misilitsinnerannut tulliuuttumut peqataaniarneq piginneqataasup nalunaatugissaavaa.

Imm. 4. Naammagittaalliuuttip suliarineqarnera naammagittaalliuutillu tunniunneranit kingusinnerpaamik qaammatit marluk qaangiunneranni inernera naammagittaaliuuteqartumut nalunaarutigineqareersimassaaq.

§ 8. Eqqartuussissuserisut ingerlatseqatigiiffii taakkunanilu peqataasut, tassunga ilanngullugit piginneqataasut, eqqartuussissuserisut ingerlatseqatigiiffianni aktianik piginneqataassutinilluunniit pisinerat tunisineralluunniit kiisalu piginneqataasut § 5 aamma § 6 naapertorlugit aktiaataasa piginneqataassutaasaluunniit pinngitsaaliissummik tunineqarnerat pillugu paasissutissanik tamanik Eqqartuussissuserisoqatigiinnut nalunaaruteqartussaataapput.

§ 9. Eqqartuussissuserisut ingerlatseqatigiiffii piginnittoqatigiinni piginneqatillit taakkualu ingerlatseqatigiiffiini peqataasut nalunaarummi matumani maleruaqqusanik malinninersut Eqqartuussissuserisut Siunnersuisoqatigiiffiata nakkutigissavai.

Imm. 2. Nalunaarut manna naapertorlugu pisussaaffinnik sumiginnaasoqarpat Eqqartuussissuserisut Siunnersuisoqatigiiffiata eqqartuussissuserisut ingerlatseqatigiiffiat pineqartoq aamma ingerlatseqatigiiffimmi peqataasut, tassunga ilanngullugu piginneqataasoq Advokatnævnumut naammagittaalliuutigisinnaavaat, tak. eqqartuussisarnermik inatsimmi § 94.

§ 10. Nalunaarut manna ulloq 1. januar 2010 atuutilerpoq.

Inatsisinik atortitsinermut Ministeriaqarfik, ulloq 16. december 2009

BRIAN MIKKELSEN

/ Birgit Thostrup Christensen